

增補南嶽志二卷

第十七冊



增補南嶽志詩集卷二

衡山

李子榮編次  
鄭阜康參閱

王香余  
歐陽謙

全輯

唐

孟郊懷南嶽隱士

見說祝融峯擎天勢似騰藏千尋布水出十八高僧古路無人跡  
新霞吐石稜終居將爾叟一一共余登  
千峯映碧湘眞叟此中藏飯不煮石喫眉應似髮長楓裡搯酒甕  
鶴蝨落琴牀強效忘機者斯人尙未忘

李遠贈南嶽僧

七

曾任衡陽嶽寺邊門開江水與雲連數州城郭藏寒寺一片風帆

地補百病元 卷二  
著遠天猿去不離行道處客來皆到卧床前今朝惆悵紅塵裏唯  
憶閑塘盡日眠

劉長卿題王處士草堂壁畫衡霍諸山

愛此衡霍近卷簾如可攀能令堂上客見盡湘南山青翠千萬狀  
飛來方丈間歸雲無處滅去鳥何時還勝事日相對主人常獨閑  
清陰滿四壁佳氣生重關頗與宿心會看看慰愁顏

劉長卿自道林寺西入石路至麓山寺過法崇師故居

山僧候谷口石路拂莓苔深入泉源去遙從樹杪回香隨青靄散  
鐘邊白雲來野雪空齋掩山風古殿開桂寒知自發松老問誰栽  
惆悵湘江水何人更渡杯

崔珣道林寺

臨湘之濱麓之隅西有松樹東岸無松風千里擺不斷竹泉瀉入  
千僧廚宏梁大棟何足貴山寺難有山泉俱四時唯下不敢入燭  
龍安敢停斯須遠公池上種何物碧蘿扇底紅鱗魚香閣朝鳴大  
法鼓天宮夜轉三乘書野花市井栽不著山雞飲啄聲相呼金檻  
僧迴步步影石盆水濺聯聯珠北臨高處日正午舉手欲摸黃金  
烏遙江大船小於葉遠村雜樹齊如蔬潭州城郭存何處東邊一  
片青模糊今來古往人滿地勞生未了歸邱墟長卿之門久寂寞  
五言七字誇規模我吟杜詩清入骨灌頂何必須醍醐白日不照  
耒陽縣黃天厄死饑寒軀明珠大貝採欲盡蚌蛤空滿赤沙湖今

我題詩亦無味懷賢覽古成長吁不如興罷過江去已有好月明  
歸途

裴說道林寺

獨立憑危欄高低落照間寺分一派水僧鎖半房山對面浮世隔  
垂簾到老閑煙雲與塵土寸步不相關

宋

范成大重遊南嶽

捨舟得馬如馭氣步入青松三十里我從蠻嶺瘴煙來不怕雲雨  
埋嶽趾憶昔南征欵廟庭往來無恙神所祉當時已有歸田願帝  
臨此心如白水煌煌南征館於東手握八觚温玉璽駿奔潯霍左

右輔好生不殺扶炎紀崇禋竣事曉壇空躋攀小試青鞋底不知  
雲磴幾千丈但見漫山白龍尾石頭招我上南臺瑞應欄干天半  
倚福巖鐘聲過橋來髣髴三生如夢裏堂中尊者已先去臺鎖巖  
扉何日啟竹嫌磽确老逾瘦松畏高寒蟠不起癯儒尙病怕登臨  
幽討未窮行且止我評七十二高峯鬱律穹窿少觀美儼然可瞻  
不可斲往往雄尊如負屐乃知嶽鎮蓋深厚不與他山爭秀偉區  
區獻狀眩兒童乳洞淡巖真戲耳

范成大題嶽麓道鄉臺

山外江水黃江外滿城綠城外杳無際天低到平陸長煙貫楚尾  
遠勢帶吳蜀故園東北望遊子欄干曲

范成大南臺瑞應閣和韻

衝雨上山頭臨行看山腳松間一彈指開此寶樓閣草鞋方費錢  
拂子不暇握小偈出雷音千古驚猿鶴

潘若冲寄南嶽廖融

曾經別墅住行蹤春浪和煙撼釣筒共步幽亭連石蘚寄眠靜榻  
帶松風秋來頻夢嶽雲白別後應添鶴頂紅又泛扁舟隨汴水不  
堪南望思忡忡

鄧林送衡山琴畫張道士

滿天風月澹蕭騷三尺孤桐古調高不敢問君聽別操請彈一干

五離騷



滿空煙雨澹模糊三尺霜縑老墨枯不敢問君求別景請描七十峯圖

道人夏元鼎南嶽絕句

崆峒訪道至湘湖萬卷詩書看轉愚踏破鐵鞵無覓處得來全不費工夫

謝邁題戴崧石鼎聯句

衡山道士熊豹姿夜過劉生逢說詩止於座隅初莫識口不能言心自知坐中清逸校書郎新有詩聲誰過之豈知老子興不淺捕逐鬼物囚蛟螭須臾指鼎出佳句脫畧凡韻生新奇二生得句不敢吐鳴聲強作秋蟲悲懼如窻鳥避鷹隼懷如敗將收旌旗借問

北  
下  
卷  
二  
舐筆摹者誰定是槃礴真畫師退之斯文有妙處丹青寫盡初無  
遺彌明得道如不死應在衡山深處棲端能過我挑詩敵與君周  
旋不敢辭

潘昉題嶽麓寺道鄉臺

坡仙不謫黃黃應無雪堂道鄉不如新此臺無道鄉青山非其人  
山靈能頡頑一落名勝手境與人俱香悲吟倚空寂臨眺生慷慨  
道鄉不可作承君不可忘

元

胡汲仲半山亭

萬疊嵐光冷滴衣清泉白石鎖煙扉半山出落日樵相語一徑寒松

僧獨歸葉墮誤驚幽鳥去林空不礙斷雲飛層崖峭壁疑無路忽  
有鐘聲出翠微

明

管大勳祀嶽歌

維嶽巖巖總齊南荒宅土阜岷厥威孔彰於皇秩祀爰肇虞黃碧  
壇嘉嘉璇宮煌煌廣廷肅謁禮文煥將戒而有司薦而烝嘗豈曰  
明德以馨以香朱旒翩翩赤靈洋洋鸞輿至此有赫其光

猗與那與執鼓逢逢噦噦管簫維樂融融珪璧斯奠玄纁載供瑩  
兮純兮表余之衷旣滌我笙旣昭我恭於豆於登靡物不豐薄言  
酌之曷報之功載觴載獻思齊雍容陟降不遐篤祐攸同惠施蒸

黎祈匪在躬

禮嚴駿假厥終匪懈受釐元神於昭未艾六龍飛駕五雲騰蓋神  
飈若馳迴翔天外秀巒隆隆靈水澌澌億萬斯年埒於嵩岱綏此  
南服永錫豐泰

湯顯祖懷曾舜徵衡山

年少相逢在何所山東道上風塵語零落相思今一時美人悠悠  
隔江楚一上春官垂廿年滿目無人私自憐此生薄相自應爾似  
子通材那復然長安有懷未傾瀉回雁峯前音不下忽傳南嶽金  
簡文來振西方白蓮社雲門酬唱老生涯衡廬真作往來家有情  
身中無盡藏與子同開心肺花

高珩衡湘雜詠

回雁峯邊過秋初雁未來渡江驕語雁我自永南回

高珩衡湘道上

山水高深各異方兼長合是數衡湘東吳回首無喬嶽嫵媚青山似女郎

陳恭尹登祝融峯

祝融高不測雲雨及其半濛濛在太古乾坤猶未判九州有餘覽  
旭日夜中且臨睨懷百憂因高發南歎

陳恭尹南嶽道中從石浪菴上至高臺寺

晨飯氣始晴初日在山缺紆迴出林莽揖與老僧別摳衣陟天路

長和百集元 卷二  
百里上積雪適來厯崔巍反視若邱垤清冷墜冰響淅瀝霜枝折  
中峯方眇然將登且當歇

陳恭尹宿高臺寺

山南勢盤鬱開豁獨斯宇中天置茅屋上與祝融伍階下俯眾峯  
窗間括南土夜冥江火近日出寒簷雨託宿此最高終身未更數  
陳恭尹下祝融峯向白門寺道中作

披離中林雪厭浥下山路緣高懍若墜身外不敢顧藤蘿援我行  
飛鳥爭我度我下羣木鳴我上寒雲互迹從逝溪遠心與幽賞在  
萬里方自今重期豈能預遲遲聞遠鐘懍懍日將暮

吳偉業送李退菴侍御章使湖南從兵間探衡山洞壑諸勝

歸省還吳

一官之楚復遊燕歸去還乘笠澤船戎馬千山尋洞壑鶯花三月  
羨神仙路穿江底聞雞犬家在湖中接水天不似少陵長作客祝  
融峯下住年年

李騰芳南臺寺

萬壑長吞天子氣千崖競吐大王風自是古來山獨壯好教吾黨  
句長雄

丘憲章送惠來尹康見東歸衡山

何事辭黃綬朱陵洞未關養邀微祿至病謝宰官閒父老將殘別  
兒童臥轍攀衡山招隱地爲我卜雲間

程可則回雁峯寄家書

一封家信寄瀟湘  
暫把他鄉作故鄉  
此後春來應有雁  
莫言飛不過衡陽

文徵明酬湛甘泉招遊南嶽

家世衡陽有釣臺  
江湖流浪未能回  
正懷桑梓千年計  
忽枉封題萬里來  
月滿羅浮勞我夢  
雲埋嶽麓待公開  
追攀見說襟懷壯  
儻許春風杖履陪

僧破門南嶽雜詠

踏盡雲根問路忙  
春風陣陣野花香  
無心石上觀流水  
不覺穿雲到草堂



此地多奇不問年石生雲霧樹生煙週圍樓閣松兼竹一帶青山  
畫裏天

清

姚鼐嶽麓寺

萬林圍一嶺古寺仰白日客來亭午後峯陰路嶮峻山巔長風起  
鼓盪四蕭瑟寒聲沈谿涯激轉久未畢老僧寂來對坐石邈悽慄  
延登佛閣望清湘隔林出雉堞帶洲斜帆檣轉雲疾此身偶南寄  
天光正東溢新霜倏已零斑駁青林密殿角兩鬢松風雨失傳匹  
惟有石間泉澄泓總如一前賢杳無見來者悵難必試將萬古懷

移問金仙術

詣嶽麓書院有述

夙秉聖賢說太息懷斯文矧近講席前遺址播餘芬湘東望湘西  
連山如陣雲亟渡入谷口空翠四邊分築室倚崖巒開宇面巖根  
當門古澗響環墉高樹曛荒榛延暮色冷風交遠聞去去六百年  
垂教志何勤藹彼援鶉手傷茲獲角麋吾生志不就斯世邈無羣  
回艫天地晚空悵水沄沄

張金鏞和劉岷登祝融峯次韓韻

門樓撰句思韓公硬語鬱盤沓靄中卅年卧遊夢衡嶽文筆要藉  
山靈雄侍郎題詩語奇重靈境邈忽知難窮君持文枋五更崱口  
吸真髓提宗風軫旁星沙號才藪教術獨以真誠通天狗墮地閱

幾載名都奧區人煙空茲邦瀕危幸完保減賦民氣猶融融頗聞  
豫章沸羣醜鱗鱷恣據神龍宮枕江城邑勢瓦解人血殷奪江花  
紅疆臣聞帥受恩重憂勞何計分皇衷君從詞曹陟端貳感激陳  
力占匪躬深規妙畫積寸臆定知入告無雷同人心悔旣天厭亂  
狂瀾滂勃其有終邯鄲之步躡君後迂疏造士難程功何時尋山  
慰夙願天雞夜唱雲朦朧會凌絕頂搗墨本下方傳唱劉景東

登南嶽三首

乾坤定卑高繼明占離祉極天配火德衡山屹南紀星精灼朱鳥  
淳闕苞文啟關一起伏亘始終靈奇秘真髓千秋杜韓筆邈絕後

人擬眇彼天柱山胡來武皇禮

馴息上封寺十重陟九重靡迤勉駟卒遂登祝融峯忽覺木棉單  
虛步躡天風古殿逼星斗靄昱仙人宮遙矚不見水但見雲童童  
雲起在足下裊之衣袖中飄颻神靈雨一洒氛雜空

振策下絕巘載憩南天門靈岫縝古色玄黃錯紛綸頽視冥冥鳥  
上搏蟠青垠滂翠四面來泱匝蒼煙根危立岌無倚但覺樞維尊  
頽曦留午暉下界當過中我身一蚍蜉萬象影外塵

夜宿嶽廟雨

靈澤雨濛濛元都獻歛通幢搖星氣綠竈烟電光紅穹骨悲忠獻  
超塵憶退翁我必入岑闕饑虎吸長風

彭齡師古橋口號

衡山迤下見平原二十里餘村落繁小市青帘臨大路征人馬上  
載朝暾

南嶽山巔泉流

七十二峯挺奇轟峯巔自古飛泉瀑龍潛蛟蟠興雲雨喧豨如江  
何翻覆客言近譬諸人身人身血氣高下勻膚寸毫末具生意騰  
蒸注瀉相環循陶子言嶽是石體泉穿其噉流瀾瀾玲瓏剔透九  
千丈空處含元罕涯涘我評陶言山理得客通乎人心亦核乾坤  
於吾胎孕全日月星辰在胸臆全受全歸恐未能勉令官骸各供

職

青玉壇

紫霞三秀青玉壇鬱紆煙雲隱射千咫尺渾如蜀道難謾說贛水  
惶恐灘我學前賢守身完况無扶搖助羽翰我所主者此心丹偶  
然履險心安安我來青玉壇上立賺得煙雲千萬級

流杯池偕袁爾介蔡友微家繼先限韻

袖子誅茅未踰年遊人此地幾流連春花春鳥助修禊筆底誰饒  
萬斛泉

流觴絕似永和年覓句深期謝惠連醉罷烹茶煩老衲端知氣味  
是飛泉

春來春去自年年遊者如斯斷斷復連憂生莫學蘭亭記品水疑沾  
第一泉

合江亭

石鼓之山石一卷迢迢二水滙其前山根合在澄泓裏石骨從知  
渾沌年煙樹亭臺相隱見薜蘿碑碣與盤旋衡湘遊展自千古况  
復名賢此後先

曉霞峯晴眺

海闊天空無盡期峯巔四望總迷離吾遊誤落朝霞後望裏晴光  
詎不知

花藥寺

城南緩步復城西纔出街坊見藥畦驛路征夫紅叱撥魚苗販豎  
白銅鞮行經古寺神偏寂坐對山僧性不迷還到小亭一回首人

煙礙日嶺雲低

避暑清涼寺

火雲峯翠律行坐汗如漿出郭憩招提輒復得清涼老僧餽茗椀  
齒頰餘芬芳梵書淨几上對之起矜莊門外譁負販門內日晷長  
須臾微風至旛影自低昂樊籠信難釋於此學坐忘

歐陽正煥九日偕同志登麓峯

策杖連朝興未刪乘風直上叩天關松濤足底寒蒼鬣岫影雲中  
墮翠鬢但得重陽無細雨甯辭盡日看秋山芒鞋幾爲藤蘿破卻  
只登臨意自閑

登山便復覺山低七尺孱軀更莫齊何處逍遙非淨宇到來縹緲



是丹梯精神陡覺疲還健眼界寬時醉不迷莫漫逢人誇落帽最  
高峯始見天倪

馮敏昌遊嶽旬日文太和以佳酒見餉賦詩謝之

清揚宛在乍情濃別去翛然似不逢豈謂一盛醞醪酒傳來萬丈  
祝融峯雨檐夜久還成夢雲海朝來更盪胸無物相隨何以報仙  
壇折取萬年松

自京師寄衡山文太和

七十二峯如筍立中有偉人形貌岌文章德業洗湘流天涯知己

何時集

曠楚賢贈文太和八十  
壽序曾引此詩

沈棨望衡山

位列南維正川涂引興長玄雲開九日青氣滿三湘江漢仍縈帶  
嵩恒自頡頏輕帆堪攬秀的的任回翔

响嶼碑

衡山之陽响嶼峯拔地萬丈凌半空時巡轍迹已云邈稽古大禹  
留奇蹤齋心禱祀到白馬勤身疏鑿悲黃熊崖懸蚪斗字如掌精  
光奕奕搖雙瞳筆鋒勁正拗璆鐵字體飄動盤虬龍祝融呵護庚  
辰守藤蘿包絡煙雲封峯回路阻猿鳥絕昌黎萬索難爲功神物  
隱顯有時會古色忽露青蒼中蜀士尋山不辭遠道人見後仍再  
逢茅山嶽麓盡傳刻筋骨不異形模同陋儒疑質強區別羹蜩胡  
乃滕頰舌神姦九鼎還鑄刑日月百寶曾鏤牒鈎石製器子孫貽

典謨紀冊勳華協傳心經世兩則宜載功勒石皆理窟兌戈周廟  
恒羅陳甘棠南國嚴翦伐十洲有記合欽崇豈比秦碑與漢碣後  
來音釋徒爾爲揣摩點畫生恍惚荒醒怪夢數百年是非不足當  
一映我聞洛書傳自古商人衍範陳疇招示傳纖屑此碑尙冀爲  
我譯真詮免教文命終古微言絕

登曉霞峯焙楚珩上人

縣門青未了名巖此回環百粵斜陽外三湘落木間天低雲作路  
岸斷水爲關一別蓮花社何人更往還

胡德琳出望嶽門

迢迢開雲嶺峨峨望嶽門韓公值雨晦默禱多煩寃吾今遇晴煦

奇峯同崩奔黛色天際來亭午日未昏道邊開流泉已覺清心魂  
晚自九龍泉至八里坪

九龍坳畔策初停八里坪前夜已冥泉浸稻畦千頃白煙滋嶽色  
半天青蛙聲闐闐如鳴柝螢火輝輝欲亂星西蜀地形同上下恍  
然清夢昔曾經

玉版橋水熱

華嚴十里路迢迢擲鉢峯前玉版橋記取山人許元度相思風月  
不堪招

半山亭

回首峯巒集披襟雲海寬到山方一斗踰險已千盤勇笑童奴怯

狂憐中立難祝融在何許螺髻露高寒

坐半雲菴遠眺

小菴出雲際而勢可遠眺萬象不偃蹇登臨得其要側想峯露生  
吐納亦殊妙卽此見蓬瀛何必矜海嶠老僧分半間拂衣可長嘯  
觀音巖尋念菴松欲至元明洞不果

望月臺前樹仙橋復一逢僧誇羅漢菜我愛念菴松瘦影團青蓋  
寒濤亂晚鐘元明餘洞壑惆悵恨隔塵蹤

雲梯

陡絕疑無路登天故有梯雲生雙足下目盡九江西樵唱高逾響  
山禽午亂啼茶煙炊幾縷客子意都迷

登祝融峯絕頂

祝融九千丈雲深時隱見譬如上帝尊深居不易見初謂眾峯齊  
雄長爭後先及乎登絕頂羅列如裳弁高者纔並肩低者僅及跗  
環拱衛周廬次第分九面湘蒸合其右界道五匹練左眺雲夢澤  
茫茫白一片豈惟盡荆楚直欲窮海甸巉巉捨身崖稜稜鐵瓦殿  
罡風一回薄久視頭目眩是時遣祀餘金簡致遙奠大武功告成  
四海永清宴陋哉秦漢君無故遠封禪

上峯寺訪雲浪上人不值

地闢登封日天開第一山簷高金作鼎寺古樹爲關濁浪風初定  
孤雲晴未還僧雛解迎客且話片時閒

絡絲潭

潺潺澗水出自朱陵洞匯爲絡絲潭水怒石欲動嶽志故云云  
相傳信者衆有僧獨不然謂是山澗送始知著書難疑信堪一閱  
曠敏本望日臺

萬丈撐空俯大荒南天生面獨堂堂山將日月供吞吐水泛乾坤  
入混茫下視星辰垂碧落平看鳥背負朝陽塵寰望去眞如蠓楚  
澤稀微濫一觴

觀音巖

嵌空石壁劇森森翠篠蒙茸盡綠沈雲蕩南天晴亦兩山銜白日  
晝恒陰萬年松不滿三尺六月雪猶深十尋熱退幾教流汗返吳

地補南精志  
卷一  
航燕轍欲灰心

王晚生和劉岷登祝融峯次韓韻

祝融高可謁天公祝融大特壓楚中環繞峩峩七十二無一可與  
爭長雄磅礴鬱積氣偶洩葳苕著尤藏無窮卯金才子奉使節山  
川草木熙春風榎枿玉尺裁量定燭物靈犀藻思通藥籠採罷躡  
絕頂俯仰乾坤眼界空後身金粟如來是暫假禪關駐馬融文星  
軫宿會光彩文明象本屬離宮提筆長篇搖五嶽羞同刻翠與雕  
紅鐵畫銀鈎費匠石筆正當先審厥衷摩挲拂拭爭臨揚墨寶喜  
見自我躬他日嘉謨隨人告采風尚俗輶軒同我到蓬萊第二次  
幾回欲詠意難終壽嶽何緣瞻壽老作人化育沐奇功請看紫蓋



芙蓉上萬古雲翳掃朦朧吾道南來盡景仰衆流趨附大江東

俞鳳翰題張東墅嶽麓記游圖

往歲游嶽麓歸來恨無詩幽勝總在目歷歷令人思君今命游屐  
來與余相期塵事動羈絆未獲蚤駢隨君歸手一卷意欲傲我爲  
前有無礙畫後有君題詩丹赭點秋葉苔荒石參差始述寺蹟古  
再志山綠奇篇終雜感喟谿壑生寒姿人生若朝露世途多險巖  
名山脚可到不遊詎非癡昔讀黃山記恂恍夢見之屬我爲題詠  
句成拙可嗤今復重誣諉搜腸撚吟髭卻怪綉紗女緣何憐東施

南嶽遊仙八首

漫將黃白說神通溷跡塵寰懶送窮擬訪菜園王十八來尋市上

增補南嶺志  
卷二  
賣薑翁

紙驢那肯謁金輪  
大酉丹還獨抱真  
記得祝融峯上見  
堯年丙子說生辰

珊珊仙骨本天生  
況有夫人遇石英  
澗水自調雲母屑  
不須長鑱斫黃精

明鏡元真妙道該  
懶從羽蓋到蓬萊  
先生新署湖浮號  
石室閒騎白豹來

遨遊碧海任西東  
自笑勞人逐轉蓬  
一幅蒲帆隨意挂  
赤君曾授術回風

人間小謫幾經年  
脈脈情思藕樣牽  
女伴暫拋張潤玉  
偷將條脫

送羊權

朱陵洞口白雲稠  
鴻爪曾從石壁留  
主者彭簪何處去  
百千萬世可重遊

一雙溪鹿喫蕉花  
翠壁丹梯落日斜  
爛醉率牛呼不醒  
峯頭獨自採紅霞

鄧輔綸冒雨登嶽頂

侵曉趨靈宮  
振衣凌絕劣  
度澗緣坡陁  
諸嶺爛熳出  
威遲鬱以紆  
攀頓窮所陟  
五峯非不尊  
對面了可卽  
回睇來時山  
伏地皆自失  
方躡嶽杪雲  
遙瞰海東日  
誰爲五里霧  
跼步天地塞  
倏忽百靈聚  
咫尺元氣逼  
前登但一徑  
俯視無四極  
直下二萬丈  
虛空窮深黑

蒼茫冥漠意瀕洞大古色六鑿俱已空嗟哉造化力

與龍璋訂遊蓮花峯因雨不果

七二青蓮花跌萼自相締一花帝其間花花爲之衛有如邢尹姿  
施嬙皆卻睇又如箕潁流岳牧不敢例褐玉貴知希扶輿亦珍閉  
懸想鴻濛初獨立天地際禹鑿閼炎荒虞巡肇遐裔逮宋紀二賢  
芳蹤邈千歲心目共高深跬步存惕厲往躅猶未湮來武復誰繼  
緣雲切攀躋涉澗緬厲揭寒河祇詩流徒留嘯臺碣船山古遺民  
獨洒蓮峰淚通塞理一齊夷險道俱濟如何嚮往心莫接尼山袂  
危脆一瞬軀蹉跎百年涕中道阻徊徨良時委氛曠髮鬢眾壑哀  
悵望浮雲翳安得御冷風高舉謝塵境虛白方浩然光景非我繫

甘露既已滅地大亦云贅將協靈上占期符良止契

黑沙潭

我聞黑沙潭下卽蟄龍宅寒瀑雜驚湍森森見虎跡懸蘿三大字  
蘚剝深可惜

嘉會堂

浩氣塞兩間天壤莫能大  
名山有此堂萬古一嘉會  
誰令嚮往者  
躊躇白雲外

補衲臺

一法本非有萬象森已虛  
晨興補破衲趺膝便有餘  
安用地大供尊者徒區區

湧几石

兩石屹如銜上下互齟齬湧几誰所爲  
睨壁猶錯愕問石石不知  
渾渾相倚薄

雙江口

楓梓鬱菁幽半壁如絕頂遠視但蒼蒼  
始歎黑山迴何當渡雙江  
微徑入溟滓

娑羅泉

甘露一夕覺明月當空禪上有菩提樹  
下有娑羅泉撥霧掬寒綠  
飲此心泠然

張修府雁峯登高和詩次昌黎韻

三生雅慕逍遙公廿年悔落塵網中江山在眼此佳節題餠詩膽  
猶豪雄故人相攜策筇杖身陟翠微目已窮湘波千里盪斜日嶽  
色萬嶂回長風塔鈴替戾似延客拂衣絕頂禪界通優曇花香鳥  
銜蕊菩提樹古龍拏空華嚴樓閣舊遊厯坐久不覺心神融名山  
大半占仙釋此境豈讓修羅宮恒河沙劫六塵累世間兒女紛青  
紅解脫外膠便撒手鈍根自信言由衷喟欬世事仗宏力使君蹇  
蹇王臣躬巖壑雲霄任所遇因緣時節聊從同于喁發響振林木  
梵唄遙答歌三終忽搔華髮念余弟垂老硯田望歲功峯頭孤雁  
警寒月寥天秋碧光腫臙茱萸手把悵歸臥鱸莼一夕思江東

衡山圖集顧亭林句

萬里河山人落落世以東南爲大壑南方亦是小中原湘山削立  
天之角嶽崆七十有二峯磅礴萬古無終窮憑高結構留仙宮上  
界帝子居其中十年天地干戈老心傷衡嶽祠前道乍回別鶴下  
重雲忽見晴皋鋪白草三山五嶽漫相逢適意川巖物象同儻許  
相隨拾芝草何時結屋依長松

陳鍾英從方廣寺取道田心登祝融峯觀日出 一百韻

維嶽柄南鎮秩祀亞柴燔不到祝融峯安知赤帝尊高尋舜禹迹  
省方事明禋寂寥四千載輦路生荆榛後王代遣祀牲幣鮮躬親  
封禪非美德秦漢不足論豈無賢聖君或亦戒游盤古今治世異  
何必聚訟紛靈宮肅崇閣壯此寰中觀嶽嶽司寇公經始惟其賢



一新歷代規百丈拓袤延廟右包八寺左附觀亦然兩庭列松檜  
虯姿何輪困神靈起援世至竟歸涅槃人心重報本感應爲因緣  
時維秋之仲俗習尙禮山瑣細各有求氓庶爭駿奔喁唱動行路  
吾人遜精專嶽市自何昉閭閻日喧闐我昔夢登岱獨行杳無羣  
四顧何所見白雲蒙我身結念在五嶽誰能問真源近歲迫顛患  
流落江湖邊秋風送歸棹及茲黃葉前冥心契遐賞佳興窮幽攀  
出郭未十里遠近堆青巒山靈如有惜峯峯抽氤氲雄姿倏隱現  
元氣相吐吞深谷潛蛟蛇名山富風雲晷刻數殊狀安能測其神  
齋宿投佛閣雷雨中宵殷賦詩獻嶽靈待旦憂心繁籃輿向方廣  
陰晴猶未分鳥道盤虛空詰曲愁攀援磴壑轉幽邃流泉聲潺潺

急雨從東來夕陽落塵寰盤旋過西嶺高下隨煙痕寺在峯中間  
瓣瓣攢青蓮昔帝灑宸翰遺墨今尙存旁爲二賢祠仰止重流連  
叢林遂蕭條嘉會亦闕焉詰朝決杖策萬丈凌高寒險夷互倚伏  
中有陌與阡取徑穿田心注目層雲端真形茲乃見如笠欹其巔  
後山最哈呀直上衝暝煙當路屹危石奇秀森嶙峋問名瞬卽忘  
下拜愧米顛是時風怒號驚眩亡精魂咋指悔則遲狂叫有誰聞  
途窮正茫昧瞥覩燈懸竿老廟石爲屋又興歧路歎僧以火來照  
邂逅開重昏導我出榛莽止宿光天壇吾宗信法器舌本如瀾翻  
頗窺河圖蘊因論太極根上寺卽古光天壇主僧金山湘潭人吾宗也頗曉河洛之旨遐想元  
始初无朕妙渾淪一氣鼓磅礴凝結爲厚坤墳列錯岡阜平衍敷

川原海岳極高大虛空一漚塵維天闢圓蓋含有施陶鈞融液降  
雨露飛精綴星辰二曜挈綱維往來明屈伸卽相本無迹詰由咸  
有因人物居其中心與覆載均積妄成管蠡百非起紛紜佛說須  
彌山一柱界四天日月繞之行從東而南旋以此測垂象實勝周  
渾宣世人無道眼謬誤千古沿說日有出落并言獲觀瀾欲一執  
斯間默禱心彌虔罡風猛竟夕豁然開塵氛明星瑩可摘月光爛  
如銀亟登望日臺下方浩漫漫煙爲燧前相眾寶搖紛綸毫芒逼  
天界晃煜若無垠明霞受其色五采交相鮮是之謂雲海吐納扶  
桑瞰金烏忽三躍須臾走晶丸左右久摩盪直視不容眴彩輪豈  
升降兩兒真戲言炎涼歸道次五行爲之躔仰觀與旁矚烏可同

其倫已復登絕頂呼吸通帝閣小山若盃盞伏地拜厥孫羣峯盡  
來朝植笏相比肩湘江一衣帶數折縈迴環赫赫响嘯碑蟲鳥祕  
元文至人秉高行白衣來聽禪長嘯懷鄴侯英風亦已泯王霸出  
宏達性命通幽元但自策精猛焉用謗神仙回頭謝山靈步下南  
天門斯遊信艱阻觀止情未闌昔人各有述敢謂破天慳如語非  
創獲予舌安可捫

中秋後一夕齋宿嶽廟雷雨晦冥賦詩祈晴

表鎮炎方壓厚坤直須拄杖入天門九嶷望隔蒼梧遠五嶺來朝  
赤帝尊不道雷池送風雨要看雲海盪神魂登山頗亦能高詠可  
許明朝放彩曦

南嶽

風雲萬丈涌天關一綫丹梯尙可攀  
半嶺已橫雷雨上中峯疑在  
斗牛間禪師白足龍威伏帝闕  
青文鳥跡環過午忽驚銀海現  
便同隔世不知還

參差七十二芙蓉回望峯峯拱祝融  
四面星辰懸履下五更雲海  
盪胸中南包嶺嶠蒼梧小北走瀟湘  
紫蓋雄夜靜還聞喧鐵瓦寺  
樓搖動半天風

朱明一柱鎮邊塵封禪無文亦避秦  
南峙真形當軫翼西來元氣  
接我岷蓮花方廣前朝寺柿葉靈源  
萬壑春欲就山僧論出處當  
時煨芋是何人

夕月平臨寶露高  
霽朝千里見秋毫  
洞庭波起浮衣帶  
天柱峯迴界羽毛  
煙霧下方先送暝  
松杉數尺便生濤  
自從虞夏南巡後  
翠葆霓旌想像勞

王廉遊南嶽

偉哉造物闢鴻濛  
平地湧出七十二芙蓉  
我來正在清和中  
扁舟直泝玉玲瓏  
湘君助我一帆風  
快鶻奇鷁翊飛蓬  
林阜相屬三百里  
已是仙境非凡庸  
我友宰衡留侯宗  
相迎一笑尋赤松  
笋輿灣環磴道通  
前途接引來已公  
危石嵯峨飛泉喧  
眎眼花眩亂耳爲  
聾  
五丁力士競喘息  
汗流浹背雲盪胸  
天門一上九千七百三十丈  
莽蒼一望四圍同  
天柱如柱石廩如廩  
眾星環拱朝祝融  
紫蓋

偃蹇如尉佗魁結箕踞爭長雄屹嶮兜率宮紛紛集仙翁踟躕雲  
霧裏跨鶴鞭癡龍元君來降光熊熊諸天清梵酣笙鐘墨池淵深  
筆未山崇構思十年枉探索幽玄奧交總夢夢金泥玉檢攀仰絕  
如此靈山何能窮吁嗟乎如此靈山何能窮

文盛祥祝融望日畢自南天門至方廣寺

好趁雞鳴下祝融半輪紅日曉霜風晴烘客路來方廣靜入禪堂  
悟太空誰掃煙雲窺象外欲探造化入懷中耆年眺望携孫伴萬  
壑千巖總不童

曾傳薪和文盛祥遊嶽

出岫秋羅變夏峯蒼茫雲海盪吾胸瀑流古澗供瓢飲苔結荒碑

作篆封錯落蟲書承帝命平分鴟芋仰禪宗滿懷幽興知何託坐  
對巖頭百歲松

文嶽英和文盛祥遊嶽

聞道扶鳩上祝融秋高兩腋御清風天邊日月懸雙照雨後雲煙  
掃半空烽火幾年驚海內草廬何處是隆中感時有句奚囊滿背  
負頻頻五尺童

文雄和文盛祥遊嶽

芙蓉朵朵插奇峯吐盡騷人錦繡胸幾度興酣留彩筆不曾遊倦  
憶黃封金輪看去臨千仞玉版參來悟六宗欲認前身何處是山  
頭明月挂喬松



何燮贈南嶽曠亦峯

七十二峯東幽居迥不同  
窗前春日草橋畔舊時楓  
弱歲馳文苑鴻名重頰宮  
敲詩風入韻作賦力摩空  
潔己人如玉持躬行似銅  
書生真面目豪氣古英雄  
種樹成村里開軒對祝融  
瀑飛千仞白山看夕陽紅  
絳帳傳經學丹鉛見性功  
蘇湖門下士蓮社主人翁  
報國心常切憂時念不窮  
笳聲悲戰馬江水歎沙蟲  
矯矯三秋鶴森森百尺桐  
盤桓松竹外慷慨詠歌中  
泉石身難老風雲路自通  
向來題壁處相待碧紗籠

招友人隱居南嶽

君擬祝融峯下住宦遊且莫定  
行蹤念庵留得當時屋五百年前

地補南嶽志  
卷二  
舊種松

題南嶽圖

七二青芙蓉中有千年鶴擬上祝融巔翹然俯林壑不獲一登臨  
山林資笑謔奇絕董北苑妙筆描衡霍莫作卧遊圖但得閒中樂  
名山亦有靈與君期後約

登曉霞峯

雲歛四山青巖扉豁翠屏澗泥蝸作篆禪院鳥溫經石磴餘霜果  
松根結茯苓數聲清磬起幽壑響泠泠

禪房古木抱飛簷繞屋扶疏綠透簾一夜崖前新過雨潑將活翠  
上松尖

王閻運麓山寺六朝松折後歌

羣山陰陰連道林一株旁立氣蕭森無心與眾鬪高古自愛幽閒  
雲岫深游人但訝色蒼怪水經湘志無年代晉寺重興宋及梁六  
朝電逝山如黛岱華猶無三代松此松兼恥受秦封屈作南朝一  
名品泠泠灑灑生清風自唐及明少題詠僻生山峽幽人性近來  
唐羅始知敬百年游屐破苔徑誰知貞性不好名楚風始盛天下  
驚空山偃蹇慣岑寂安能時聽世俗評從來千年飽霜雪去年微  
凍虬枝折亦如老聃去流沙非仙非死憑人說世中俗人不見松  
猶道山光雲氣同寄言知者莫歎息君不見許由巢父無人識

羅鳴鶴望嶽

祝融高萬丈峭拔迴凌空直接三千界遙連七二峯明霞掛絕頂  
宿霧掃層穹徑欲扶筇杖長歌倚祝融

南嶽道中作

天柱峯頭月朱陵洞裏風

二句節用朱子詩

詩成殘日落人歇暮煙濛去

路迷松圃前林隱梵宮昔賢曾到此何處覓遺蹤

回雁峯二首

萬里南飛雁相傳到此回昔年曾駐佛更待幾時來  
依舊青山在高僧不可尋無人思獨往靜憩綠槐陰

遊流杯池偶作

逍遙何處寄遊蹤聲在前峯夕照中仙去仙來人不識至今惟有

洞花紅

嶽麓書院

地近長沙郭雲高岳麓峯四山環拱近一院占當中水會湘流派  
絃歌洛下風昔賢曾講學遺像禮尊崇

李芝遊青城山擬南旋登回雁峯

世上休疑我是仙青城山畔暫流連回翔雁影凌雲去正是黃花  
秋酒天

戴督賓日歌

古往今來登祝融遙遙心接東海東祝融暗裏持仙柄有緣無緣  
適然逢鯁生命居磨蝎宮咄咄相左屢書空壯哉海若憐我拙捧

出金鏡醒鴻濛雨師早歛玉女雨風伯不助大王風萬里太空任  
橫覽真宰直訴碧翁翁碧翁翁溥而公小小缺限總彌縫山人別  
饒山中福行附金烏踏九重玉皇怡需香案吏或許搢笏慶升庸  
澄懷七十二峰頂羲和敲日覺我聾十二萬年駒過恩恩不先不  
後託身其中主人卽嫌賓客雜慎勿再彎后羿弓苔滑不蠟屐徑  
險不扶筇心香一瓣祝帝座呼吸通儒冠儒服蟻蝨臣朝日如此  
敬且恭

上封寺和韻

天開寶界拱芙蓉青玉壇前尺土封鐵腳叫回莊叟夢塵心撞斷  
梵王鐘雲樓唵佛經含潤石壁題詩墨轉濃太息大雄金頂杳黃

巾高唱度羣峰

監修高臺寺

幽人訪古隔塵蹤使車迢遞駕芙蓉

謂督修夏芝岑觀察

愛人及樹護土石

虬枝遠蔭梵王宮佛氏慈悲儒忠恕兩家俎豆異而同菩薩低眉  
問狀頭君胡挂冠辭九重名山訂交及方外相與攜手碧蘿峰圓  
明洞裏讀書樂道脈隱與石蓮通四維長者具神力右可伏象左  
降龍毋怪蒼松歷浩劫柯條不改簇葱葱自從元家留衣鉢楚人  
不沒吳人功一龕香火一粟主儼若桑梓切敬恭何況豫章蔚後  
起今賢綽有古賢風手把朱提付赤嶽鼓動神鬼氣吐虹石工木  
工一齊作忍耐勞苦日有功我時督役寺已廢行李半肩寄上封

夜披重衾毛骨竦鐵瓦聲碎冰玲瓏一月便得卅五日高臺快若  
靈臺崇譽嘉宣子饒古趣有亭翼然臨古松怪石下蟠勒蝌蚪筆  
力古勁逼李邕月池埋土歲復歲倏忽剖露仗化工古今顯晦皆  
幻相造物顛倒誰能窮

月池篇和韻

天上皎皎一輪月如何跌下埋南嶽迢遙相望五百年曲斷霓裳  
仙子樂仙子頗憚蟾宮煩直帥蛟龍共潛壑酒徒幾番醉相招呼  
之不應孤畢卓月華顯從霄漢騰月魄隱向池中落深恐姮娥迷  
歸處欲言不言含綿邈恨無神禹碑再鑄下界凡夫筆都攔摩崖  
二字勢軒昂醒迷奚齊尼山鐸飛白力健透石背未知鍾王遣誰



斲月池上卽古月臺我言雖創匪膚廓額題湮沒年復年是耶非  
耶悟今昨荷鋤揖請劉伯倫及鋒而試光閃鑠曩時低壓伏塗泥  
此日高懸驚岝嶸山靈意特厚使君爲闢奇觀偏數數使君本是  
飛仙侶遠掘黑沙尋尺蠖因緣文字仗法王卒與奇峰破寂寞乘  
流導引獲甘泉池深妙不勞穿鑿念菴松植八九株飲泉一一來  
黃鶴先生紀異新有詩鳶魚妙理闡飛躍池塘佳句夢裏得恍惚  
離奇神漠漠公門不少桃李穠菲材請附參苓藥現身明月幾生  
修毋爽石上高僧約

重遊錫巖洞

鑿開混沌知何代穿入煙雲似有梯我比漁郎高一著重來古洞

不能迷

遊玉壺巖

媧皇補天不補地留些罅漏顯神異山魃睜目那敢窺飛龍橫掃  
萬千崇龍兮蟠踞幾經年鱗騰爪掀跡宛然左角直抵星宿海右  
角驚翻蛟螭淵迴旋鬱怒勢未已驪珠一溜不計里散爲光芒照  
大千方疑日月菁華暫休歛而避此

觀河林訪破門往蹟

萬劫難銷文字禪觀河題額肅張顛高蹤恐被人猜破門閉韋陀  
鎖篆煙

寄南嶽澹然上人

儒生何事轉空門，浩劫餘灰不忍論。  
挂錫嬾擔天下重，抱書猶見秀才尊。  
禪心早醒紅塵夢，佛腳須尋赤嶽痕。  
迴憶牂牁來去路，曾中雲夢幾回吞。

題南嶽八指頭陀詩集

了無煙火氣，總此冰雪心。  
妙語由神助，清辭對客吟。  
功深戒定慧，夢證去來今。  
勝友滿天下，山陰一賞音。

袁蔚南重九集中紫峰鎮南寺和韻

詩家酒國不分疆，島佛坡仙孰抑揚。  
難得素交連四郡，如斯嘉會幾重陽。  
名山翹首似延客，菩薩低眉任與觴。  
臭味能同由道合，諸君聞否木樨香。

長安府志 卷二  
嚴玉森寓南臺寺

東家磬碎吟黃庭西家燈枯誦金經了無一事閉門坐殘醉昨宵  
今未醒

春日偕戴心葵高臺寺懷羅念菴

聽鷓山館春光好曾共松陰憶念菴當日急流能勇退孤根日月  
照天南

香爐峯訪曠亦峯

香爐峯下桃花艷楓木橋東泉水清中有幽人耐枯寂花時微坐  
聽泉聲

向萬鏐送李郁歸衡山

斷雁寒蘆極浦邊  
數聲風笛各淒然  
深情得似汪倫否  
惆悵當年李謫仙

萬里燕南共壯遊  
金樽銀燭暫綢繆  
送君心逐湘江水  
便到衡山未轉頭

蒼蒼風景歲將暮  
殘菊傲霜猶待君  
幽人掉臂獨長往  
七十二峯生白雲

李郁夜宿上封寺

飛身直到白雲端  
薄暮人從畫裏看  
石氣靜生雲滿室  
霞光近接客憑欄  
風搜簷腹諸天暝  
月到峯頭十倍寒  
洗淨俗心塵夢斷  
冷泠鐘磬徹宵殘

獅子泉

淵泉時出曲流杯上有靈獅踞石臺峭骨天成森眼目吼聲宵震  
撼風雷松脂落翠經霜化苔髮梳青醞雨推吸霧吞雲深歲月老  
龍應許助吟哀

祝高嶺

攀蘿迤邐行飛鳥向人起卻顧來時路身在衆峯裏

鐵佛寺

古寺嵌崖出低簷壓帽懸石凝山溜滴鐵鍊佛心豎人影穿雲窟  
鐘聲落樹巔老僧如舊識煮茗且談禪

南天門

崔巍壽嶽鎮離宮門到南天氣象雄萬里湖山空眼底十年塵翳  
盪胸中摩挲仙跡無人識咫尺天顏有路通峯下白雲峯上日舉  
頭仍見一輪紅

試心石

頽然巖石墮峯腰下界煙雲萬丈遙顧我未曾履艱險捫心來過  
試心橋

月夜步胡文定種蓮池遺址

長笛一聲風籟靜短衣雙袖月光寒種蓮池畔閑來往水面天心  
仔細看

廖養正重九南天門放歌

白石勢欲上青霄拜石爲兄將鶴招黃鶴一雙駕高曠黃花一枝  
香酒瓢酒瓢斜挂棲霞室山中奴婢千頭橘隄然脚下曳晴雲老  
猿處處偷霜粟借問黃花來酒國可曾一見陶彭澤彭澤由來醉  
不醒目光炯炯對螟蛉劉伶大笑阮籍哭蒼天爲幕雲爲屋雲是  
蓬萊織女車直上青霄跨仙鹿雙足踏翻元鶴背雲中多少仙犬  
吠蒼蚪飛過斗牛宮金童駭怪琉璃碎天鼓碎訇震天關耳聒玉  
皇香案吏金銀臺上雲中君八琅璈奏起氤氳閭闔晴天舒浩蕩  
王母西降九霞裙投壺玉女開笑口彩鸞駕爾東西走白鶴蒼龍  
莫相猜五百年前任去來

上峯寺



沙彌笠掛五株松山鳥驚穿翠萬重淺草晴嵐秋後路淡煙寒樹  
午時鐘僧高已有冰霜氣石老多留鸞鶴蹤鐵瓦如鱗泉似玉金  
壺常帶紫雲封

廖鴻鍾遊嶽偶占

披襟穿嶽雲臨風采芳杜忽見山中樵石上磨利斧人淡語言稀  
心清毛髮古獨立風吹衣瀟瀟一路雨

廖壽清懶殘巖歇天門歷太守石王十八洞

浩浩闔風鶴未歸天門翹首意多違坐看奇石難容袖行拂朝霜  
漸滿衣郭外千峯朝北極雲間五水繞南飛此來竟作真人想寂  
寞荒巖且叩扉

登祝融峯

城郭昔時非高人證息機天風動閭闔吹我芙蓉衣

游智開登祝融峯

蜀不及登峨眉粵不及遊羅浮朝衫換却歸來後直到芙蓉最上頭千巖萬壑競秀特如盤蛟螭驂騑騶磅礴大氣久必洩才俊應運真奇尤君不見當日洪楊肆橫流東南半壁成墟邱一朝義勇奮霆擊修我矛戟爭同仇問誰建立中興業曾左胡彭江羅劉名將聯翩下江左收回破碎奠金甌於乎聖清赫赫政治修沐日浴月光神州願得真卿次山大手筆勒銘天柱石廩垂千秋

譚嗣同登祝融峯

身高殊不覺四顧乃無峯但有浮雲度時時一盪胸地沈星盡沒  
天躍日初鎔半勺洞庭水秋寒欲起龍

白帝高尋後三年得此遊芒鞋能幾兩踏破萬山秋獨立乾坤迴  
坐觀江海流朱陵有遺洞懷古一搜求

李輔燿送鄭阜康歸衡山

合江亭畔乍逢君握手殷勤話夕曛柔艣一聲春漲滿幾回回望  
嶽山雲

易順鼎答友人游嶽

故人久不見昨乃登祝融摩空吟大句響震千年松溟濛下界雨  
倒溼遊仙蹤烘衣翠尚滴芋火僧樓紅遠寄空中書似有雲氣封

地補南嶺志 卷二  
憐余本行腳夢聽南天鐘何時築精舍投老蓮花峯

白巖同毛實君廖笙陔鄭硯孫游嶽無詩作九言代爲解嘲

聞君乃作祝融峯頂遊開函已覺雲氣蒸雙眸目迷心炫準備讀  
奇作朗吟大句宿疾當全瘳尺書閱盡四顧若有失意中所必往  
往偏難售閱圓案居想君高興發醉呼明月便上湘江舟東坡二  
客君更添其一筆牀茶竈命侶而搜迷綠蓑紅笠照影亦清絕卽  
此蹤迹已不慙盟鷗餘閒且作四子講德論崇議閎辨聚聽來鱗  
儻煙波遊湖微同范少伯雪夜泛剡卻異王子猷瀟湘縹緲中有  
異人住萬重綠意深裹漁家幽扣舷高歌呼之如欲出飄飄仙氣  
結想眞靈儁胸中早吞八九雲夢澤耳畔惟聽廿五離騷謳布帆

九轉倏隨落照落山城一角半入浮嵐浮行三十里始見松下寺  
筍輿輕快豈必誇鳴騶嶽靈微笑拱手似相待振衣千仞直上休  
夷猶七十二峯峯峒宿靄四百八寺寺縣靈湫南天無人下  
視雲海白疑登岱頂九點橫齊州天門書開破空飛電出赤者如  
馬黃者如金蚪雷聲泉聲合沓難復辨楓杉栝柏雜以梧松楸山  
鳴谷應萬壑相震動奔瀉咫尺身外成浮漚此時四山響沸人語  
斷但聞天垂海立搖颼颼豐隆列缺方巖逐客令九天九地頗覺  
人焉度狂奔狼狽不顧山鬼笑風聲鶴唳若避仇家仇一雲缺處  
一寺補其缺敲門急入幸未逢比丘烘衣解履滿身霧尙滴微紅  
芋火速乞山僧葺須臾雨止始復返嶽廟相視而笑問有詩篇不

眼前奇景那可乏奇句此四人者不答皆搖頭得無誤信司空表  
聖說不著一字謂足稱風流玩物喪志或守宋儒戒朱張理學刻  
意追前修兩廡特豚雖擬下一箸核諸平日未免相盾矛二者云  
云吾斯未能信勸君且作語不驚人休乾坤清氣萬古凝結處題  
詩不稱祇贅煙霞疣混沌書眉佛頭著鳥糞何若一詞不贊猶爲  
優赤城賦霞僅許孫綽獨廬山詠瀑漫洗徐凝羞吾曰否否是蓋  
別有說天所不與人力難強偷古來惟有才人最橫絕能使真宰  
聚泣精靈愁神天萬怪欲遁不可得山魂石骨一一傷雕鏤山神  
因之禦詩比禦敵空中鐙火夜聚羣真謀停雲蓄雨本爲今日用  
悉索敝賦不待操戈及使彼一身自顧且不暇疲於奔命豈復能

冥搜誰知詩人細思計亦得各從其便藉脫詩中囚雖無某邱某  
壑紀遊草名山勝概早被心魂收甯我負山無使山負我直言不  
諱更是奸雄尤君聞鄙言心印當首肯一洗俗見耳食兼毛求二  
十年前我本一行腳嶽雲深處定有茅庵留蓮花峯頭三生淨業  
在塵世墮落欲往嗟無由他年與君尋詩復尋夢芒鞋踏破上界  
層層秋向平婚嫁未知何日畢故人有約待我山中樓

方廣謁二賢祠

感不絕於余心泝流風而獨寫念天地之悠悠獨愴然而淚下  
雪夜聯吟入上方至今嘉會尙名堂空山不用尋蘋藻一朵蓮花

一瓣香

樊增祥和王湘綺九日登嶽麓

高秋眺雲物萬里同晴陰  
公歸陟嶽麓我駕循西岑  
槃糕旣切玉籬菊始散金  
節物固不異睠焉同素心  
南埭雞膠膠北山雨沈沈  
攝我芙蓉裳整我茱萸簪  
庶幾江上船如馬來駸駸  
何意津梁疲偃息湘江濱  
三復白馬篇仍韜空谷音  
西園百叢花抱膝成獨吟  
期牙一以別無復理瑤琴  
縱有山水曲誰知高與深

李子榮南嶽廟

炎荒瀕洞獨司權  
璀璨琳宮日月懸  
駐蹕禮隆虞玉帛  
授書功奠夏山川  
紅羊小劫重恢宇  
朱鳥靈光舊應天  
一笠危亭撐鼻屨  
煌煌御藻耀千年



春莫偕譚銘山遊流杯池

泉滌九曲抱亭臺  
詞客當年岸幘來  
曾對雲山揮翰墨  
祇餘碑碣蝕莓苔  
巖前流水潺湲響  
洞口桃花爛熳開  
修禊展期沿故事  
及時行樂且含杯

春莫偕鄧雪六文擅湖遊麓山卽贈陳伯濤

游人愛春華  
春晚芬未歇  
攜侶遵舊途  
嗜幽得靈窟  
雨久萬景晦  
晴新眾采發  
高下綺交錯  
深淺氣蓬勃  
盎然溢予襟  
駘宕陶嘉月  
踏石偃蒼苔  
攀林依翠樾  
滄波樹杪留  
陰霞谷中沒  
鷓鴣爾何慙  
嘒聲弄清越  
年光若流電  
爲歡及玄髮  
寄語山阿人  
相期采薇蕨

遊曉霞峯

不到此山久今晨岸角巾還尋路崎曲休怪客逡巡井水祈神活  
天香散座頻恒沙無量劫僧亦後來人

遊巾紫峯

傍宅開三徑攀林見一庵烏嗥知客到花靜少人探遠漲生春雨  
連城擁夕嵐洞仙如可訪相與控飛驂

嶽路

局促羈塵土吾生木石頑忽疑天路近真到嶽雲間大道平如砥  
連峯樾若關農家雞犬樂不復類人寰

嶽市

咫尺神仙府連輿得得來人聲雜墟市天影逼樓臺采朮煙霞祕

攀松歲月猜靈宮終古肅專柄亦雄哉

謁嶽廟有感

離宮終古福爭微氣象高凌逼斗杓德應炎精宜正祀碑探宸翰  
斷前朝鯨鐘鼉鼓驚雷奮碧瓦朱甍瘴霧消梁棟那堪蟲蟻蝕亟  
須柱石奠嶠嶢

重九日周紹熙邀同諸君陪羅庚甫縣長集中紫峯寺次鄭

虞琴韻 二首

久將筋力惜衰年咫尺雲山若遠天修禊嬾尋流水曲題糕直突  
古人前一簾細雨黃花酒三徑清霜白足禪偶向壁間畱醉墨不  
知是佛是飛仙

擬挈喬松較歲年更攜雋句問青天蒼蒼岳色連雲表澹澹湘漪  
捲席前角里先生宜作主香山居士合皈禪白鹽赤米山中物勝  
飫瓊膏醉列仙

和袁叔輿同遊巾紫峯次前年壁上韻 二首

空山日月送年年又是春光欲暮天聯步逕尋桃塢曲舊遊人憶  
菊尊前流觴作會宜三月回壁冥情證四禪臨汝詠歌聲未歇緣  
深香火問金仙

壁紗籠句已經年咳唾輪君落九天成佛肯居靈運後焚香同禮  
梵王前喚殘山鳥歡迎客開到溪花妙解禪婚嫁向平能了願相  
攜五嶽訪真仙

題李鄴侯故居

白衣何意紫袍加，絕粒棲神託興賒。  
師友早聞資道義，山人未合老煙霞。  
十年事業半分芋，一曲歌辭四摘瓜。  
迹類子房饒智畧，天恩給俸至今誇。

李子茂望嶽

巨鎮開名嶽，山山南向奔。嵯峨千巘接，端肅一峯尊。  
霞外高爲障，天邊黛有痕。神功藏雨澤，靈氣蘊雲根。  
大谷蛟龍蟄，深林虎豹屯。梵宮隨處闢，香火入秋繁。  
九面湘帆轉，三冬野火燔。何當凌絕頂，臺上看朝暉。

獨遊流杯池登山尋水原歌

茲山雄駿冠羣阜下有窟宅潛龍蚪翠壁如削聳斜豎落蘚青燐  
滴不休怪石倒垂洞穴闢靈泉上噴靜幽幽昔人作池引水曲修  
禊於此飛觥籌其旁有澗勢洶涌如匹練布如丹鉤出山未宜誚  
水濁美利足使禾黍稠卻望雨原來山頂玉虹對飲低其頭我遊  
屈指已三度今始尋原奮窮搜左趨側徑上峻阪牽藤捫葛侶緩  
蹂陂陀婁踏非所計惜哉攜手無良儔一水滾滾去何駛千阻萬  
過難遮畱雪濺瓊飛倏中劈潺湲聲激風颼颼旋合旋分分復合  
隨山就下行蝸蟻誰知溢出伏榛下揭衣欲避夫何由置身漸高  
水漸小辨音差與琴筑侔復陟巖窈升絕巘纔自雲竇吐細流涓  
涓勿竭成巨浸此理卽目堪推求稍藉草坐蘇喘息天將曛黑息

山陬西來原遠未可覓俟我異日重來遊行行歸舍記所歷句弱  
恐惹山靈羞

古冢行倣張籍北邙行體

巾紫峰陬多古冢樵牧牛羊競登壟生世誰思烏過影直待長眠  
息馳騁浮名浮利驅人忙紛紛酣醉不願醒去者日疏來者繼天  
地悠悠一灑涕高低鱗次草鋪茵莫詢富貴與賤貧姓字湮沈人  
代改白骨千年朽化塵嵯峨碑碣終磨滅何如志行保芳絜

秋日遊嶽麓峰

靈麓隔湘江高閣延秋爽遂乘風日涼躡步愜心賞雜樹非一青  
飛泉成萬響煙峽暖蒼蒼雲徑浮泱泱耽奇企石畱尋異攀條上

振袂升崇巔山川俯修廣明曠際平湖曾蔚帶林莽晴城佳氣靄  
澂野清暉盪拓視收遠景融神淨塵埃葺宇期它年茲焉遂偃仰

嶽茶

山茶徧地栽嶽產稱佳種旁連紫蓋高近接白雲聳青出三春芽  
林壑蔽萋葦摘宜穀雨前婦孺紛接踵品徵唐史推字辨許書總  
白露及昌明頡頏靡輕重曾讀文山詩壓疊寶如珙想當修道士  
換骨配鉛汞頻年問價昂今歲益騰踊已嗟餉給難况值干戈動  
彌岡少採擷避難多流冗城市致無由梗阻行路恐有客偶求售  
頓令笑口啐新得快新嘗白乳勝流湏煩慮賴湔除塵勞感倥偬  
既欣良友詒更待嘉賓奉吟興引甕甌抽毫無縱臾會攜明月團



往聽靈泉涌

山人饋藤實

多年罌蔓嶽雲封果熟離離八月中製杖幾時娛老壽登盤分啖  
聚孩童去皮酢莫將梨比棄核甘還與李同仙術未須誇絳樹好  
將汁白問山翁

服黃精

仙人去後餘糧在漢代曾偕巨勝推數典龍銜稽雅訓錫名雞格  
問良醫葉如竹箭垂多實根似萎蕤秀一枝二月向陽峰上茁三  
春通潤井旁滋茅山莫謂長生邈太室惟應大隱宜術返寅申資  
辟穀義探戊己類茹芝搜求赤嶽猶須待收拾黃冠冑見貽白鶴

跨來尋藥日丹砂飛罷餌花時鹿場兔窟餐偏贖麟脯龍胎意早  
馳尹喜秘傳青簡籍羊公妙法絳都基煙霞伴侶巖栖結天地精  
華物理窺瓊笈未諳經訣授玉英好竝易林披養蒙興發昌齡詠  
捐俗情賒穎士詩六癸六壬空卻熱九蒸九曝足扶衰延齡定許  
丹顏駐住世休遭白髮欺幸賴救荒功勝朮翻愁難療此邦饑

竹米

並序

民國七年戊午南嶽諸山小竹產米二月生穗開花色白至五  
月之末穗下垂色黃實如麥而稍長破其稃色白其實易落居  
民采之以當饗殮亦可爲餽粥餅餌大竹則無有也

坤德資生厚南方任養隆頓收千畝富無慮一囊空歲歉誰哀穀

兵興又轉蓬屯軍儲易竭乞糴阻難通細葉蒼煙冪輕條綠霧籠  
肩榆艱日食雨粟仗天公雪白花盈榦雲黃子滿叢仲春紛粲粲  
孟夏秀芄芃乏待三農卹飢先五月充摘時憐淨綠穫到誚陳紅  
肉匪生江左柑殊產粵東兩歧均紀異再熟共稱豐豈但成資餅  
宜教佐種種浙餘晨爨熟擣罷晚炊融甘蜜陽山擬明珠海島同  
奇珍巴界瑞隱緬薊門風隴右唐蘇困池州宋拯窮來牟尊帝命  
糜芑拜神功薏苡輸多稼雕胡遜聚稷草閒愁婦女木酪誑愚蒙  
獨愛幽篁結真銷比戶忡蒲羸超海上糜粥謝途中練實雛鵲樂  
孤根老鳳狎應教繁籟愆自覺別雌雄禪侶餐徒薄麻姑術漫工  
龍孫全活衆果腹慶田翁

南嶽紀事

雲封衡霍翠深沈羽客閒房蟻賊等祝聖寺高錢乍罄集賢院廣  
酒徐斟雷礮大礮來驚衆狼籍殘杯棄走林鋒蝟斧蟾聲震疊街  
頭振旅散羸金

望衡嶽

自來嶽鎮重南衡仰見青空突兀撐千里送迎江路遠九回向背  
陣雲橫古皇祀比三公秩近地災罹數載兵慨念時危香火減禱  
祈何日慰羣情

鄧茵谿縣長邀飲巾紫峯寺中次鄭虞琴韻

鐘聲徐動歎聲闌滿壁題詩入戶看古寺地高憑眺迥清樽晝永

放懷寬天邊遠岫如雲疊雨後鮮花作雪團列座談諧觴政簡未  
知是客是尊官

澄清上人招陪鄧苴谿縣長及諸友人同集清涼寺次前韻

二首

滿天風雨鳥聲闌佛印相逢一笑看煨芋緣深慚李泌縣蒲澤沛  
樂劉寬花光照眼春將半蘭契同心客坐團梅戰已輸豪飲量漫  
思吟續鄭都官

巾紫峰頭興未闌珠璣妙句快同看雷連光景襟懷洽脫略形骸  
禮數寬地遠囂塵人語靜筵開深院樹陰團它年珍重飛觴處蓮  
社多情語宰官

地補南嶺志 卷二  
李福田書記以從董贊勛旅長祀嶽四律見示作此奉答  
南來祀嶽肅威儀上將明虔幕友隨夾路嵐光迎劍珮五峰雲氣  
導旌旗巡方典重稽虞世治水功成憶夏時報答神休民望慰公  
餘增得錦囊詩

李登雲中秋回雁峯玩月歌

我欲左挽浮邱之手右拍洪崖之肩策道士擎空之杖乘真人戲  
海之蓮窮游七寶清虛府頰視萬頃琉璃田素娥羽衣歌法曲天  
厨麟脯開瓊筵金母並頭木公笑終古繁憂一日湔罡風吹墮知  
何年追逐魚鼈江湖邊飲河滿腹苦不足墨突往往無朝煙紅蟬  
蝕字二十稔芸香不救饑窘煎愁來輒墮嗣宗淚路歧枉著祖逖

鞭木樨花香秋月圓一尊孤上回雁巔白露曖空氣肅爽輕風送  
涼山靜娟磨曼空青一鏡縣鴻濛萬象收眼前岫嶁芙蓉森巖嶒  
湘君帝子靜往還鱗鱗碧瓦光如霰擾擾緇塵人未眠竹院梵魚  
偏闐寂市樓簫鼓競喧闐一聲長嘯千慮捐飄飄七尺凌飛仙深  
杯數飲不辭醉唾壺擊缺不自憐人生但得官作金吾功勒燕然  
富賴倚頓壽高彭錢持肥齒梁肉被服麗且鮮前行騶從塞中路  
後堂女伎鳴游絃豈必神仙與聖賢吟成醉拔蔗竿舞當筵意氣  
劇雷顛

鄭阜康陪李芳畦遊祝融峯和韻

殿閣高寒聳太空飛身疑入碧琳宮雲生萬壑搖滄海雨過千峯

挂彩虹山勢極天星斗近湘流縈帶澧沅通恨無謝眺驚人句枉  
御冷然列子風

雲海

韓公去後雲蒼莽絕巘迷離孤島懸鐵脚大呼曾盪海玉壇小立  
頂摩天槎浮碧漢疑招我濤捲青松聽亦仙瞬息齊煙銷九點扶  
桑高湧一輪圓

長壽菴訪嚴玉森

遠發維揚郡來浮湘水舟尋仙入衡嶽禮佛住僧樓氣骨冰霜冷  
文章江漢流清談忘日暮歸路四山秋

護松碑和韻



虬松蒼翠鬱南天風雨名山三百年陵谷遷移心不改雪霜欺壓  
節彌堅枝柯偃蹇龍筋瘦巖壑陰森鶴夢圓種樹人非碑尚在青  
青長聳嶽峯巔

過西嶺

西嶺極天峻攀援艱復艱亭懸丹嶂外路出白雲間遠近萬千象  
陰晴前後山往來誠草草慙對野人閒

雪中遊方廣二賢祠

昔賢已去留孳屐今我重來謁宋祠喧澗石泉鏘古韻漫天風雪  
憶當時蓮峯八面藏經寺筇杖雙枝洗衲池山半黑龍呼不起流  
連潭壑誤歸期

秋祭南嶽廟

衡南七二峯刻露秀芙蓉風勁落黃葉秋高寒碧松靈宮肅樽俎  
福地聞鼓鐘祭罷霜天曉蒼蒼雲萬重

祀嶽神歸里

爐煙歸惹袖襟香疑雨疑晴日色黃倦卧筍輿忘路遠滿林紅葉  
醉新霜

祭鄒東廓

姚江及門士衡嶽講經筵故國一千里流風三百年雞豚春社地  
樽俎夕陽天俯仰懷前哲山花薦杜鵑

謁錢大錯和尚墓

集賢院外草離離四尺崇封萬古悲龍去鼎湖雲黯黯鶴歸華表  
月遲遲南都已覆家何在西竺權飯佛自知一掬荒寒憑弔淚洒  
將林麓溼殘碑

謁沈健菴先生墓

鳧舄東飛路萬重抱琴來聽祝融鐘身羈鶉嶽四千里夢斷龍關  
十九峯講舍傳心人紹脉洱河歸骨子無蹤臨終望子不至愴懷坏土荒  
煙裏颯颯寒風響碧松

感宣統登極御祭碑仆

一炷沈檀出紫宸疆臣馳命肅明禋文成北斗天垂象碑峙東川  
嶽降神不信龍墀繞霆電頡教最碣仆沙塵天心到此堪微會朝

市於今果易秦

登巾紫峰和韻

蘭若重來廿四年  
雨餘雲淡菊花天  
三秋橘柚寒煙裏  
萬井樓臺落照前  
人醉藍田崔氏酒  
我參紺宇法王禪  
要知老至須行樂  
一日優遊一日仙

遊清涼寺和韻

雨餘鐘鼓春正闌  
綠樹搖窓著意看  
汲鼎僧烹茶乳活  
鎮山人解帶圍寬  
筍香有味塵心淡  
花影長簷佛髻團  
十笏維摩清淨室  
勝居丞署老卽官

九日與王蘭軒歐陽劬甫游流杯池

丹楓黃葉九秋天攜屐來遊集眾仙一徑穿雲披宿莽兩山夾壑  
瀉寒泉觴浮曲水源猶活亭峙荒巖石不堅此地昔爲通德里酸  
心楹桷翠微巔

開戶見曉霞峯

我有半畝宅門對曉霞峯隔江寒日沈青松磊砢刻削堆芙蓉有  
時豔慘變天容入雲天矯如遊龍欲尋山寺一扶筇蕭蕭落葉聞  
清鐘

祝聖寺贈方丈頂巖

蘭若莊嚴暖復涼榴花紅間桂花黃一塵不到法王院百衲齊參  
選佛場月證禪心秋在水風生妙舌氣如霜干戈滿地閒來此淨

洗煩囂對夕陽

贈僧綱掃塵

頷袖名山稱長老  
經壇獨啜八關齋  
閒門秋草縈孤砌  
古壁疎梅畫一階  
洗鉢分泉煮靈藥  
撥爐燒葉斫生柴  
烽煙四境塵心淨  
忘卻蟲沙處處皆

過南嶽廟懷嚴玉森

先生昔遊衡嶽巔  
暑無葛帔寒無氈  
此身祇爲吟詩苦  
瘦如孤鶴嘹雲天  
寺僧不識揚州叟  
日日鐘聲鳴飯後  
挈瓢惟煮在山泉  
臥聽松濤喧戶牖  
有時抵掌話滄桑  
嬉笑怒罵皆文章  
親見鳶鳥啄腐鼠  
耻隨鷄鶩爭餘糧  
不慕科名慕風雅  
香山早結白蓮社  
奮髯

箕踞發高歌蹙踏南陽邁東野墨瀋猶留蜀錦箋殘篇朗誦句如  
仙回思四十年前夢城郭綠楊生遠煙

先生楊州人

望九仙觀憶昔遊

萬岫崢嶸柱笏看暮雲深處九仙壇道人庭宇終年靜磬石冰霜  
古篆寒廿載車輪周赤縣一龕燈火慕黃冠舊遊記宿琳宮月夜  
半狂吟楓葉丹

三元宮懷鄧衡峯道長

舊院重相訪人亡事亦非玄都來已晚黃鶴去難歸道範懷眉宇  
仙壇剩羽衣棲真何處所蒼莽嶽雲飛

康鐸半山亭小憩

地祇百篇志 卷二  
祝融高聳渺雲漢中有亭峙山之半泉飛戶牖樹參天到此境已  
仙凡判我來五月日止烈洞壑雲深暑全滅重綿不煖葛衫單那  
知人世有炎熱小憩搗衣緣級上絕頂未到心先往徑登絕頂路  
如何遙聆一聲清磬響

暮從半山亭登上封寺

山色澹斜暉團團月初霽屩躡半山亭徑上上封寺出亭一峯高  
岌業當前立截途似武夫立馬橫刀揖緣磴僂僂登峯上峯又起  
層巒插雲中碧天真尺咫攀石捫藤蘿絕頂公然至巍我山寺古  
倚門聊小憩帶月入禪堂露冷衣襟溼解衣立佛前一凍幾欲泣  
老僧出欣然合十忙把臂憐我葛衫單教我袈裟試趺足坐蒲團



旃檀香滿室不知清夜永履霜出看日

祝融峯次黃庭堅韻

位鎮離垣入碧霄下窮龍窟上虹橋見孫鷺鶴團羅近兄弟嵩恆  
隔阻透地脉崑崙通隱隱天星軫翼應迢迢瀑寒夏挾雷霆疾露  
冷秋催草木凋笠澤湘江雲外落蓬萊瀛海望中搖巉巖有雪春  
方盡禪榻無風暑自消寶鼎香焚添艾莢金雞曉唱奏簫韶紫微  
逼近真堪掇局促呻吟度一宵

觀念庵松

靈根盤踞祝融巔氣蒼貌古心貞堅風霆雨雪不敢犯孤高特立  
巖寒天天桃穠李競芬芳此時養晦獨自傷千古繁華爭一瞬卻

北極圖經元 卷二  
畱勁節聳高岡我來見樹如見心擬磨片石勒銘箴拈筆欲下未  
卽下濤聲四起作龍吟

懶殘巖

巖畱仙去幾時還糞火灰寒不復然宰相古今原不少誰教半芋  
啖鑪煙

文祖念答南嶽寄禪上人

孤憤鬱難掃高僧來叩扉一聞天籟發便與世情違賈島真吾友  
衡峯且息機何當拂塵服遙逐白雲飛

侯方城觀音崖

丈室維摩不壞身巖頭還欲證前因慈航一葉來西極渡盡人間

萬劫塵

題高臺寺念菴松

三百年前手植松占鼇人去不知蹤  
高標勁節經霜雪不受秦皇  
雨後封

李子傑飛昇石

黃庭觀裏白雲隈片石嵯峨淨俗埃  
云是夫人修道處摩挲遺蹟  
拂莓苔

廖謙不語巖

煙霞洞裏信如何洞外東西挂薜蘿  
借問石巖巖不語枯僧兀坐  
唵彌陀

地補南嶺志 卷一  
羅星輝曉霞峯

曉霞高不極嵐翠捲晴新鳥語有禪意僧雛識虎馴喬松深避日  
怪石立如人銅佛何年鑄昂藏丈六身

譚德峻蓮花峯和韻

天半蓮花太古開嶽雲深處絕塵埃泉清有味諸緣淨草綠無言  
眾妙該山鳥噪林驚客到古藤著石誤峯堆二賢馬跡今何在鄰  
寺鐘聲入暮來

歐陽瑛觀音巖

拳石聳奇峯空門闢幽谷異境欣來遊四顧愜心目石瀉碧巖泉  
風掃青林竹白雲度遙岑夕照生喬木月上眾禽歸萬象極清穆

露浩輕襟涼鐘鳴羣籟肅人生天地間駒隙悲時促何如作隱淪  
此中樂寤宿

南天門

望眼何由徧九寰偶攜杖履叩天關一輪曉日騰滄海萬疊層雲  
接遠山古洞門封金竈冷禪房僧臥石爐閒瑤花芝草巖前滿不  
用仙丹別駐顏

王香余題黑沙潭

終日濛濛細雨天卽逢亭午亦籠煙四圍綠映千竿竹萬嶂青環  
數畝田水激魚驚潭口躍巖深龍抱石頭眠禱祈自古多靈驗又  
見甘霖下沛然

趙翼舟中望衡嶽

扁舟湘水獨沿迴，嶽色青蒼落酒杯。  
帆轉幾回途尙曲，雁飛不到我還來。  
懶殘芋冷餘灰燼，岫嶁碑荒沒草萊。  
屢欲登臨支柳栗，巖程無奈榜人催。

歐陽謙擬及時遊嶽

我家城西望嶽門，距離嶽趾三十里。  
年年嶽色送青來，孤負名山無屐齒。  
畸人杖策眺欽崆，搜徧千巖萬壑裏。  
摩挲古碣發清謠，邂逅高僧談妙理。  
足力已罄心無窮，日暮寒林空徙倚。  
憐余薄宦賦歸來，回首風塵今老矣。  
携筇屢欲到山巔，無奈因循事中止。  
勞生未了此身無，惱恨俗緣長擾累。  
何不擺脫一切及時遊，振衣直上

去天不盈咫，瀾漫雲海萬千重。震盪胸中紛譎詭，禽鳥喧呼解世情。音響不凡欣聒耳，崖前看瀑更雄奇。飛泉珠濺澄潭水，不然坐卧斗室中。習習真是樊籠雉，縱令散髮步郊原。煩囂祇隔城與市，不如上陟祝融峯。跨鶴踟躕風四起，悠悠天地少傳人。二賢唱和良有以。

方廣祀二賢祠

衡山七十二蓮峯，最竅奇白雲深谷裏。矗矗一叢祠，偉哉兩夫子。南來火照離吟聲，何朗朗雪霽影參差。一朝賢哲萎千載，有餘悲精靈儼下降。天際捲龍旗，嗟余生已晚。絕學望聞知，登堂肅再拜。春秋禮則宜，蒼涼廟貌改。歲久勢莫支，披榛尋古刹。剔蘚認殘碑。

到此萬想滅浩蕩與世遺獨念遊山客寂寂愧鬢眉高崖自峭拔  
曲澗自淪漪試觀石壁上題徧幾人詩當時閱無聞歿後甯見思  
疊疊朱與張道力希聖姿聲光長不朽俎豆奉師資景行如有志  
何必悔來遲車蓋多憂患曷不采紫芝寄言同行者邱壑良足怡  
禱雨黑沙潭龍王祠

蓮花峯下路十里複嶺重岡伏又起靈山元氣孕真源一泓停蓄  
寒潭水其中沐浴百寶生日月倒穿大瀛底雖晴亦雨晝濛濛非  
霧非煙籠沼沚豈無黃沙與白沙孤潭最勝終難比飛泉淅瀝憂  
玉聲冷逼心肝清透髓從來神物愛幽區噓氣成雲疑海市瑣瑣  
魚蝦避弗居抱珠獨睡深淵裏有時鱗爪互怒張驅策風霆真迅



駛須臾滂沛灑郊原屯膏不下漑  
蚪恥縣官請命爲蒼生圭璧交  
投煩祝史農氓插柳呼天公伐鼓撞鐘音聒耳感應不分官與民  
貫澈精誠有至理今年大地苦災荒十日無霖禾稼死百計經營  
尠妙策心盟潔白祈福祉老僧導引至巖前毛骨竦然威尺咫四  
圍石徑盡崎嶇我亦攀蘿同到此

祝融峯玩月

衆人看月在平地我今看月在高山高山不與平地伍盤紆突兀  
堆螺鬢此間去天僅尺五團圓月影如可攀纖雲四卷空翳蔽衆  
星環繞光爛熳千年古寺照鐵瓦清輝入室門難關旁有念菴老  
松樹虬龍偃蹇鶴幽閒夜深水輪濯巖壑枝柯掩映影姍姍古往

今來幾登嶽登嶽未必天開顏良辰美景真樂事造物厚我緣不  
慳初到半巖月色好已驚仙境非塵寰及凌絕頂月先上欲滿未  
滿弓勢彎凝眸仰視意繇邈漏闌微怯衣袂單安得九州同此夜  
陰霾掃盡瘴氣刪來朝天色定澄霽坐待天明望日還

游石鼓山朱陵後洞

巋然巨石出深淵中有朱陵後洞天二水合流開勝境七賢一脈  
契宗傳亭前雁塔干霄立樹裏虹橋隔岸懸福地何人堪管領往  
來大半是飛仙

煙霞峯訪鄴侯故宅

煙霞峯畔讀書堂挿架牙籤擁萬行今日山房蕭瑟甚階前古木

掛斜陽

讀書作相尋常事  
饒舌緣何到懶殘  
珍重芋香分一半  
山肴未許俗儒餐

黃臺一曲摘瓜詞  
苦口調停意可知  
辭去長安歸霍嶽  
山人肯爲爵羈縻

開雲樓

差我百尺矗糜城  
霧靄全收倏放晴  
莫謂回天無妙術  
丹心一點貫精誠

傷心一掬孤臣淚  
竄逐蠻荒尙未收  
今日李唐無寸土  
韓公猶自有高樓

南嶽殿柱告成紀盛

意匠經營在物先，忽驚殿柱象巍然。  
材儲大木猶嫌蠹，石借他山獨取堅。  
易朽爲新光棟宇，一勞永逸奠垓埏。  
靈宮松柏知多少，依舊葱籠罩碧煙。

王國侃石鼓懷古

朝宗萬里匯蒸湘，兩水滌洄抱曲廊。  
石咽大江丞相憾，碑留古字昔賢堂。  
而今綠淨傳名句，終古朱陵對夕陽。  
東望蒼梧南霍嶽，閒聞漁子話滄桑。

康和聲十二世祖三泉配享嶽市鄒東廓祠紀盛四十韻

十年春二月廿七，趁良辰祀享從鄒氏。  
精降嶽神韓公祠，洽比

壯繆廟爲鄰駒從開前道驩迎列大賓駿奔多士集兕酌宰官親

一辨隆歆饗千秋薦藻蘋人咸嗟異數我縷述原因孕與凡胎異

孕十四月生

生來至性醇躬行求實踐孺慕篤天倫孝友言無間周施德

倍純壽臧推世母義粟積倉困族子收傭隸兄兒畢嫁婚守身先

守約憂道不憂貧學力希賢聖潛修見性真切磋師趙郭師乳模楷

作廬新

廬陵奉新

傳習錄膺服良知學恪遵陽明私淑艾東廓近傳薪講

席畱先獲來遊步後塵流風今未歇化雨被無垠興起人心奮推

崇士論均先生禋早肅弟子典宜循贊許詞林叟李公杜生勸勸禮部臣

康劉搜羅成九證撰述歷三旬批示遵官吏呈文具搢紳年經三百

隔敬獲一時伸德善難忘沒尊榮不在身公評昭後世直道在斯

民躋濟堂階盛芬芳俎豆陳心香處士庶時食薦秋春德厚庸圖

報謀貽祐薦臻庭前雙鳳翥公子時臣時匡階下六龍馴孫元和元穆元程累葉

詩書繼雙枝茂盛勾子孫今緝緝族姓更振振十六傳遙系三千

戶密鱗鄉賢人共仰名宦蹟猶頻蕊放春秋榜香塞沼泮濱記名

心每忘屈指手難伸齒已強加馬經仍舊守麟積祖著有麟經約言躬欣逢盛典

日獲覩明禋自此年恭謁臨班作佐儉

### 王晉望嶽亭懷鄴侯

神仙本是居士號羽流竊之以欺天子房蓋棺諸葛死此中出處

阿誰傳龐公雖賢不能出鹿門株樹老蒼煙淮陰雖智不能處悔

不歸來尋釣竿三代以還一際難志士往往多微權君不聞朱鳳

噉噉祝融巔願分竹實螻蟻餐獨屏鴟梟不可奪下憫百鳥羅網  
懸君不見瀟湘之浦蒼龍眠掣雷鞭電濟早年收斂神功歸大造  
白雲洞府長舒卷神乎仙乎果何術如龍變化如鳳騫羽流本非  
龍鳳侶安能九轉旋坤乾身居君臣父子外心在虛無寂滅間縱  
使白日青天長不老呼之神仙奚取焉我讀隆中傳又聞岷上篇  
二十餘年心駭然今日登亭問南嶽中有高人得其全高人出兮  
託神仙高人處兮真神仙吁嗟兮忠孝之外無神仙

段嶽生登回雁峯

回雁弁湘嶽登臨四顧雄雨餘青未了風靜綠浮空湖海乾坤外  
關山楚粵中回看南北郭萬竈裊煙籠

釋敬安夢登祝融

忽到祝融頂青天手可捫雲霞飛寶蓋日月浴金盃異采紛難狀  
羣峯各自尊仙風吹夢失欲覓了無痕

麓山採藥

采藥入雲路行行日西斜涼風動修竹高樹藏昏鴉木脫山露骨  
澗香藤落花畱連夜深返江月鳴清笳

步月至巖市

連辰倦水宿舍舟果幽尋夕景淪西岡微月吐東林鐘鳴巖市近  
犬吠寒煙深興來神無疲事往感在今素髮驚始見青陽不重臨  
哲人去已遙慨然傷余襟



登祝蝠峯

不盪雲海胸馬壯平生觀明發  
犯霜露豈不憚嚴寒羊腸既曲折  
鳥道亦旋盤俯窺懼霧豹仰視慚  
風翰振衣一長嘯誰謂行路難  
憑高豁遠眺天地青漫漫洞庭皎  
素練滄海躍紅丸遙川六龍舞  
遠岫千蠶攢星辰爲我珮雲霞爲我冠  
嶽靈視余笑招邀敦古歡  
廻矚人間世喟然起長歎

懶殘巖

巖巖山上石鬱鬱巖前桂  
峩峩神僧居蒙蒙芳草蔽  
象教昔陵夷如何隱智慧  
長謝區中緣高結霞外契  
寧從猛虎食不拭俗人涕  
望雲有餘思高風邈難繼

麓山秋暝

碧天澄莫陰霜月出未高孤雲無定適衆鳥各趨巢息此樹下影  
念彼塵中勞清賞莫余同良友詎能招幽途成獨往一心爲神交  
山近氣恒寒不知天已秋涼颺入庭柯木落遠山稠猿鳥雜亂鳴  
逾覺館宇幽夜來新雨足溪水繞屋流真想方在茲焉周尋丹邱

方廣寺

古木寒溪一徑深尋碑蕭寺息松陰朱張祠廟秋雲冷誰會重巖  
踏雪心

高臺寺觀念庵松

高臺寒雪曉相過愛看松枝掛碧蘿珍重枯禪勤護惜念菴手植

已無多

南臺寺避暑

篔簹萬个森禪房  
田衣不脫心清涼  
山鳥一聲新睡起  
綠陰滿地  
藤花香

過廣濟寺

廣濟宜禪悅  
幽深罷送迎  
雲連虞帝廟

安上峯有舜廟相傳舜巡狩駐蹕於此

山削

禹王城

此寺峯巒削翠狀如城郭傳禹王治水經此故名

古木無樵採  
荒溪有鹿行  
巖僧

長避客不問野人名

登高臺寺有感

客心浩無極  
日暮此登臺  
寒樹蟬初歇  
秋風雁欲迴  
雲開千嶂出

湘轉一帆來借問祝融氏誰憐歷劫哀

題麓山寺

迢遙鐘梵下斜陽寂寂巖花度水香殿角一鈴風自語窗前萬木  
雨初涼山銜雲氣窺人淨江挾濤聲入海長卻羨巢松千歲鶴不  
知塵世有滄桑

磨鏡臺禮大慧師塏

尋幽不憚遠涉險趣彌深峩峩丹鳳岡鬱鬱青松林誰謂導師逝  
林木演圓音鞭車喻奧義磨鏡垂良箴我來肅瞻禮法雲靄餘陰  
繞塏周三匝憩樹披重襟境寂神來舍慮息理自臨終期滅聞見  
結宇棲青岑

禮思大禪師三生塏

至人久埋照靈關復誰叩  
玄風扇區宇神塏祕巖藪  
白骨何足云所貴道不朽  
三生靈爾始千歲豈余後  
借問幻化人知有真實否

清涼寺呈本師一首

達人貴宏道獨覺非所論  
覺花馥心地智水湛靈源  
誓然大智炬永破塵沙昏  
拂衣舍衛國開講給孤園  
豈不疲津梁彌憫四流奔  
喬嶽蘊靈異中有甘露門  
非賢豈能主惟德眾所尊  
人天一忻悅花雨何紛繁  
迦葉信小果慶喜慚鈍根  
荷法各有任嘉會何由敦  
聊勉自化志庶用酬慈恩

謁黃庭觀

偶乘獨往意來謁魏元君谷暗松杉合天清鸞鶴聞靈芝含秀色  
仙石繡苔紋坐久諸緣息晴空生片雲

慶讚體雲和尚主席麓山寺

虎岑吾祖席傳鐙喜有人遠飛雲外錫來禮定中身水乳相投合  
經過不厭頻終當卧林壑猿鶴共爲鄰

宿麓山寺

一雨滌煩暑翛然曠我襟涼風引秋意夕磬定禪心埽石成孤坐  
倚松時一吟夜深樵唱歇巖溜續清音

麓山寺題環公房

一室超諸有禪扉夜不扃山光四圍碧松色六朝青鳥啄齋餘鉢

猿窺講罷經夜深人語寂寞翠落空亭

尋蓮峯方廣寺

佳辰展宏抱超然運神足策杖循荒塗披蘿入浚谷林隙漏微陽  
苔磴繡古綠丁丁聞伐木隱隱辨麋鹿巖高岫重疊澗曲水汨汨  
陰壑蓄雲氣深洞伏龍毒經臺構嵐岑精蘭闢巖隩斷碣委荆榛  
空庭森柏竹梵籟緩歸趣翠黝眩奇矚揮袂謝山靈賞心於此獨

宿石澗紫蓋精舍

山路倏已暝余意方適然攀巖眺落景倚樹挹飛泉旣歷煙蘿倦  
還就雲窟眠林松月皎皎石澗水濺濺觀聽兩俱冥寂照生空禪  
遊心太始初不知有物先

陪吳雁舟謁嶽廟舟次昭潭

昔余癖雲水靈嶽屢瞻謁矧茲勝侶延幽興益清發江楓色始丹  
澤蘭芳未歇輕舸漾漣漪逍遙度城闕神風揚驚濤坐卧忽超越  
羣嶼互向背頽陽屢明沒汀火亂繁星渚煙媚寒月水宿聊淹留  
眞賞在林樾

題按察使夏公遊嶽

一解簪纓累名山恣意看望衡湘九轉入嶽路千盤絕頂懷韓愈  
寒巖訪懶殘懸知望日處應可見長安

聞道方廣勝逍遙得大觀泉飛六月冷衣染萬山寒老衲能分餉  
樵夫不識官朱張遺跡在聊爲小桓盤



送戴仲山歸衡山

一曲驪歌不可聞，布颿湘上掛斜曛。  
異時相訪應難遇，七十二峰多白雲。

將歸衡山別常靜法兄

塵居性不適，又向嶽雲歸。  
敢道世緣薄，空知定力微。  
不堪孤棹返，長與故人違。  
前路休相憶，春山筍蕨肥。

送雪溪上人歸雁峯

年少易爲別，此別淚沾衣。  
往事空回首，春山晚獨歸。  
白雲迷遠望，明月入禪扉。  
惟有相思夢，隨君入翠微。

謝李幼蘭明府招住上封寺

名山久寥落而我亦無能況是朱陵勝慚非白足僧幽棲誠可悅  
詩債豈宜增願乞青鋒劍爲余斬葛藤

贈吳中丞登嶽

置身七十二峰巔無復人間未了緣樵客喧傳星使至山僧猶枕  
石頭眠留餐聊撥爐中芋煮茗遙分洞口泉記取他年爲宰相莫  
言雲窟有枯禪

答吳中丞問方廣山水

方廣蓮峰深復深黑沙潭水清人心藍輿試抹雲邊過古木蒼藤  
野寺陰

贈易蘊生偕友人登祝融峰

峻極祝融頂相逢話夕曛霧高常隱日石潤每生雲草木堅逾屢  
天香靜乃聞如何入靈境尙欲戀人羣

陳嘉言題唐棣五嶽圖

唐侯足跡遍天下不藉驕驕追九野五岳雲氣堆胸中歸來縱筆  
隨揮洒瀑簾洞口泉淙淙望仙飛石連諸峯太室山高畱漢柏摩  
崖嶺峻挂秦松家本祝融峯下住少時耕釣門前路寫入煙雲縹  
緲中真山面目仍呈露我亦平生號楚狂車輪四角馬蹄方壯遊  
不遂登臨願垂老翻思年少場憶昔神州浩蕩春九州四海無煙  
塵百年禮樂崇廟廢岳瀆無靈典祀湮國瘁民傷財亦困五岳忤  
忤起方寸披圖重覽舊山河茫茫禹迹憑誰論

范源廉題唐棣五嶽圖

客從五岳歸濃雲溼袖底不復看羣山一覽培塿耳閉門繪岳圖  
尺幅勢千里縮之盈寸間突兀取神似真形在目前令我歎觀止  
想見胸次寬奇情工俶詭雲夢吞八九奚足相比儼

郭宗熙題唐棣五嶽圖

布襪青鞵自在忙一身時夾九州霜人呼謝客爲山賊刮取奇峯  
入畫囊

一自新從五岳還真形流播到人間煙雲四壁成崎岬好與宗生  
卧後看

何維樸題唐棣五嶽圖

太華峯前雪擁關登封臺上快躋攀壯遊羨子真奇福踏遍人間  
五岳還

紫錦囊中一卷圖武皇好道事虛無何如此日真形出粉本流傳  
到海隅

仲鼎曠甲啟竹米詞

我居南山中常對南山竹竹影當我窗竹枝繞我屋陡然竹開花  
驚駭衆人目花竟不虛開結實如種種是歲楚大饑饑民嗟半菽  
况當南北衝蠶爭擾邦族軍卒徧城鄉食盡倉廩穀乞糴苦無由  
共向窮途哭際此無奈何忽見竹米熟採取以充饑人踪滿崖谷  
獲粒果如何多至數萬斛擔荷夕陽時相攜樵與牧歸來椿且揉

居然能飽腹絕處竟逢生真是民之福莫非大造恩齊向衡峰祝  
粵稽紀異志始見唐天復降生在義平米可煮成粥大明成化間  
隴西復載育嘉慶岳山南採之亦盈掬至今歷四次此事堪紀錄  
應有鳳皇來就食山之麓旋看運轉移大開唐虞局

此山在岳山南岳山南採之亦盈掬至今歷四次此事堪紀錄

應有鳳皇來就食山之麓旋看運轉移大開唐虞局

此山在岳山南岳山南採之亦盈掬至今歷四次此事堪紀錄

增補南嶽志雜識

衡山

李子榮編次  
鄭阜康參閱

王香余  
歐陽謙全輯

清

俞鳳翰高辛硯齋雜著

衡山近出獸似虎而小爪牙銛利骨軟若埴躍登虎背虎不能脫  
卽洞食之喜穴牛尻入瞰食五藏而踣甚夥有封死牛腹獲獸猶  
活者土人呼爲黃斑羣牧入山有見十數黃斑蹲踞團卧曝日崇  
岡陸離爛熳簇若橫錦考劉氏鴻書猓無骨入虎口虎不能噬處  
腹齧之黃斑其卽猓之類乎

衡山清涼寺普明和尚云前見寺中石笕旁有一蛇長丈許純黑

色側扁不及寸自首至尾脊上俱有鋸刺矗列若鱗狀倏忽間竄巖下疾於矢又巨蛇多有冠或黃或白云係修煉所致

又衡山清涼寺僧寶鏡圓徑寸云係吳逆僞帥馬寶鎧上護心者先是國初一老僧夢一白虎入寺次早戒僧眾盛服待日中有白衣偉丈夫闖然入禮佛畢曰吾馬寶也行將入山留鏡而去故世守至今

曼青前在省時用一童僕王二長沙北門外人弱不好弄佼佼無佻達習咸豐四年賊逼省垣先戰一日忽拾斷鎗折鏃而虜之人問其故曰明日恐皆如此主人幸可脫同伴不免矣靖江之役我師追勦而潰伏尸踣藉共仆死者四人曼青涉水而免後調赴粵



西薦之於新甯令張小華五年賊復圍新甯勢甚阡危王二曰不及旬賊退矣後果九日解嚴時獲犯二人拘於署使守之十餘日未嘗踰闕凡其伴狎邪遊者輒唾之若浼後苦辭去數日後院中一長石板忽拆裂小華命役修砌之於石下得書一封言其叔若來尋當在麓嶽山頂清列賬目尙有贏餘屬其將母後叔果如言往覓見其跌坐山巔石上左手提一沙壺右手執蒲葵扇一枋不知何時化去矣爲禱葬之

### 文緒傳嶽工述異

民國庚申九月緒傳監修殿柱有朱桂林者石工之翹楚爲總包頭徐萬和所僱登山鑿石肇工未久向徐索酒肉俗例謂之牙薦

徐曰此項工程業已取銷此例載在承包券我無私囊可墊也朱怒對眾宣言謂明日爲望日若無肥口物當一體罷工不從命者以鐵鋤殺之是夜朱與市中無賴縱酒且演花鼓作長夜歡次日眾工拉耒仍就役下午和眾工運石塊出峰麓眾執棍曳石而前朱執鋤推石於後忽石向後轉朱不及防鋤撞其腹倒地徧身青腫昇之歸次日腹大如鼓是夜斃緒傳呈報縣署出公帑數十緡買棺運還鄉

王香余紀異

民國辛酉香余督修嶽廟自寓工程局而石工則寄居長壽庵地甚幽僻夜間鬼怪百出履聲掌聲哭泣聲不絕於耳同寢數十人

不能安枕工目徐少卿以告香余初不之信伊等怖甚皆欲罷工因禱以文怪異頓止又一夜石工黃子臣忽然顛狂踉蹌跪神前稱魯班先師下降五嶽皆有神鑒臨應添設神位九尊吾儕均宜敬慎有不潔者則訶之又一夜昏倒如前大罵同事失檢明日有凶次日徐玉貴果被石傷手詢係冶遊所致神復爲咒水開方數服卽愈又一夜黃子臣降神吞沸油及磁碗者三爍磚石手握足躡毫無懼意猶恐石柱不固正殿有凶呪香水淋之現身說法合市皆驚迄工已竣則云吾神要去諸匠叩送如禮大賓而黃石工屢昏則言動皆奇屢醒則全不自覺甚矣鬼神之爲德眞能使人戒謹恐懼而不敢肆也怪者孔子所不語香余何敢支離附會此

次則顯然目覩不得不錄其事實以爲後之將事者告

聖皇無庸意謙也古詩不同玉潔白如冰水枯之見其情也  
眼明愈又一交黃千五百則順者然而以斯詩者三數年  
凶火日將正貴與蘇之野手則對者也其時事亦與水關  
事則皆不窮者眼確之又一交書國版而大風司事夫無即日序  
林魯世夫而正則正綠皆育順聖國順齊無分共善百而自宜  
因顯以文對與馳世又一交存正萬子臣等存顯其聲能而順前  
不語宏林正且念少職以對者多不女詩也也而好其工

增補南嶽志釋子

衡山

李子榮編次  
鄭阜康參閱

王香余  
歐陽謙全輯

清

默菴

默菴號杲仁衡陽周氏子性恬淡不慕榮利祝髮事南嶽某某尊者禪定功深兼通理學寺有藏經百函師皆熟讀一字不忘一日平江李元度方伯桂林吳錦章觀察入方丈聽講法華經元元本本欽挹之至著有楞嚴易知錄教觀綱宗釋義續人天寶鑑諸書生平以利人弘法為心增置大善寺田租闢為講法之場北京法源寺道階南嶽祝聖寺佛乘皆其弟子云

海岸

海岸號識覺湘鄉王氏子祝髮後補綴衲衣修南嶽福嚴寺磨鏡臺等處寺內有法華經一卷以血和硃書之一字畢向天膜拜自始至終皆然工書法體宗北魏尤喜作詩稿散佚世不多見也衡陽彭玉麟侍郎嘗遊福嚴寺見僧寮几上有詩句甚俊逸書法亦精妙異之

敬安

敬安字寄禪自號八指頭陀湘潭人俗姓黃清光緒間隱南嶽上封寺方丈初未讀書忽能詩有唐人風韻著有八指頭陀詩集湘中士大夫異之多與之遊寄禪有自述篇湘潭王闓運葉德輝

均贈序言

玄妙

玄妙開士姓字未詳隱福嚴寺四十年不出惟一破衲禦寒暑空  
物欲深得禪悟臨終預知端坐而逝八指頭陀贈詩云古路逢樵  
問蒼茫萬壑雲偶尋高隱士重禮祝融君樹老無年代心清滅見  
聞浮名累人苦煨芋莫輕分世爭傳之

淡雲

淡雲字慧日衡陽人曆主祝聖南臺福嚴大善清涼各寺方丈緇  
流宗之四方善士謁嶽者均信爲佛門迦葉佈施巨萬駐錫各寺  
皆創建恢宏規模較前爲麗嶽市舊有義米公社賑時恒苦不足

慧日獨捐穀二百六十石釋無凡暨南臺寺大善士僧繼其志各捐穀十餘石通計三百石邑人德之曠超一曠先啟等爲記其事以書諸石

唯持

唯持字智嶧衡山戴氏子性勤儉喜讀書家貧無依萌出塵想光緒庚辰投南嶽祝聖寺禮顓西開士而披剃焉禪淨苦修夜深就讀佛燈下倦則倒地迄醒讀如故所得信施自不浪費遇寒素解囊與之示寂後僅存十餘金云

妙見

妙見名普聞原籍安徽幼遭兵燹流落湖湘閒爲衡州船家周姓



收養遂姓周祝髮後孝敬師長樂羣同參緇流宗之尋迎周氏養  
父於寺觀其沒也安厝如禮不啻生我之親湖北張伯烈爲作傳